

O Le Malamalama o Keriso

Faamanino le Malamalama o Keriso

Faitau le Mataupu Faavae ma Feagaiga 88:12–13, ma vaavaai mo faamatalaga o le Malamalama o Keriso.

Faitau le faauigaga leni o le Malamalama o Keriso:

“[O le Malamalama o Keriso o le] malosiaga faalelagi, mana, po o le uunaiga e mai le Atua e ala ia Keriso ma e tuuina mai le ola ma le malamalama i mea uma. O le tulafono lea e pulea ai mea uma i le lagi ma le lalolagi (MF&F 88:6–13). E fesoasoani foi i tagata ia malamalama i upumoni o le talalelei ma fesoasoani e tuu i latou i luga o le ala o le talalelei lea e tau atu i le faaolataga.” (Taiala i Tusinga Paia, “Malamalama, Malamalama o Keriso,” scriptures.ChurchofJesusChrist.org)

- E faapefea ona e aoteleina mea e te malamalama i ai i le Malamalama o Keriso?
- O le a sou manatu e faapefea ona aafia oe lava e le Malamalama o Keriso?

O Le Malamalama o Keriso o lo tatou lotofuatiaifo

O se tasi o faailoaga mai o le Malamalama o Keriso, o le tatou lotofuatiaifo. Tusi se faauigaga o le a malamalama ai se tamaitiiti Peraimeri i le mea ua e malamalama i ai o le lotofuatiaifo.

Faitau le faauigaga leni ma vaai po o le a se mea e mafai ona e faaopoopo atu i lau faauigaga:

“[O le lotofuatiaifo o] le lagona i totonu o le sa’o ma le sese, e sau mai le Malamalama o Keriso i tagata uma (Moro. 7:16). Ua tatou fananau mai ma se gafatia faalenatura e iloa ai le eseese i le va o le sa’o ma le sese ona o le Malamalama o Keriso ua tuuina mai i tagata uma (MF&F 84:46). O leni tomai e ta’ua o le lotofuatiaifo. O le mauaina o lena mea e avea ai i tatou ma tagata faatuatuaina. E pei foi o isi tomai, e mafai foi ona mate o tatou lotofuatiaifo e ala i le agasala po o le faaoga seseina.” (O Le Taiala i Tusinga Paia, “Lotofuatiaifo,” scriptures.ChurchofJesusChrist.org)

Faitau le Mataupu Faavae ma Feagaiga 84:45–46 ma le Moronae 7:16, ma vaavaai mo upu po o fasifuaitau o loo faamatala ai le ala e avea ai le Malamalama o Keriso ma o tatou lotofuatiaifo. Mafaufau e fai se mau fesootai mo fuaiupu e lua.

- O le a se fasifuaitau mai nei fuaiupu e fesoasoani e te malamalama ai po o le a le lotofuatiaifo?
- Aisea e te manatu ai na tuuina atu e le Tama Faalelagi ma Iesu Keriso ia te oe se lotofuatiaifo?
- E mafai faapefea e le faalogo po o le lē amanaiaina o lou lotofuatiaifo ona aafia ai filifiliga e te faia ma lou taunuuga e faavavau?

O le Malamalama o Keriso e i totonu o tagata uma

Vaai faalemafaufau e faapea ua talosagaina oe e faasoa atu se manatu puupuu i le Aoga Sa e uiga i le auala e maimoa ma taulima lelei ai tagata uma, aemaise lava i latou e ese mai ia te oe. E mafai ona e faaaogaina punaoa nei ma soo se isi lava e te iloa e aoga.

Mataupu Faavae ma Feagaiga 88:11

Mataupu Faavae ma Feagaiga 93:2

Sa aoao mai Peresitene Boyd K. Packer (1924–2015) o le Korama a Aposetolo e Toasefululua:



O le tele o le tatou iloa e uiga i le Malamalama o Keriso, o le tele foi lea o le a tatou malamalama ai e uiga i le olaga ma le faatele ona tatou maua se alofa loloto mo tagata uma. O le a avea i tatou ma ni faiaoga ma ni faifeautalai ma ni matua sili atu, ma ni alii ma ni tamaiti e sili atu ona lelei. O le a loloto atu lo tatou manatu mo o tatou uso ma tuafafine i le Ekalesia ma i latou e le talitonu. . . .

O le Malamalama o Keriso e mo le lalolagi atoa e pei o le susulu o le la lava ia. Soo se mea lava o i ai le tagata ola, o loo i ai foi le Agaga o Keriso. Ua tofusua ai agaga ola uma lava. . . .

Afai tatou te malamalama i le moni o le Malamalama o Keriso i tagata uma tatou te vaai i ai . . . ma i totonu o i tatou lava, . . . o le a tatou maua le lototele ma musumusuga e sili atu nai lo mea ua tatou iloa i lenei taimi. Ma e *tatau* lava ona faapena! Ma *o le a* faapena lava! O nei mea uma o se vaaiga o le upumoni o le talalelei lea e toalaite tele e malamalama i ai. (Boyd K. Packer, “O le Malamalama o Keriso,” *Ensign*, Ape. 2005, 8, 13–14)

Tusi se fuaiupu se lua i le tolu e mafaufau i le auala e mafai ai e le malamalama i le Malamalama o Keriso ona tosina ai le ala e te vaai atu ai i isi.

O le Malamalama o Keriso i le atulaulau

Pe ua ootia ea oe i le matagofie po o le mamalu o lenei lalolagi ma le atulaulau? O a lagona ua aumaia e nei mea ia te oe?

Faitau le Mataupu Faavae ma Feagaiga 88:7–10, 45–47 ma vaavaai mo mea ua e aoaoina e uiga i le Malamalama o Keriso, le lalolagi, ma le atulaulau.

- O le a se mea e mafai ona tatou aoaoina e uiga i le Alii mai Ana foafoaga?
- E mafai faapefea e le vaaia o aafiaga o le Atua i le atulaulau ona fesoasoani tatou te iloa ai Lona aafiaga i o tatou olaga?